

СЛУЖБА
преподобному отцу схимонаху Иоасафу Печерскому

(2 декабря н.ст.)

ВЕЧЕР

На Господи, возвах: стихиры, глас 8.

Подобен: Мученицы Господни:

Град, стояй верху горы, не может укрытися, лепоту свою миру всему показуя. Храм Духа Святаго, преподобне отче, созиждил тя есть Зиждитель мира. Того молитвами, Христе Боже, спаси души наша.

Небесная возлюбил еси, отче преподобне, паче земнаго, ум возводя на горняя, руце же простирая на дольняя, темже тесными враты возшел еси в Царство Небесное, всем верным известно спасения путь показуя.

Быв Христос ти Путеводзь и Кормчий, преплавающу море житейское претрудное, Его же помощью стяжал еси, премудре, крепость духа адамантову, такоже терпение агниче несокрушимое; тем бо и ны, немощные, укрепляеши, во еже обрести многоценнии бисери Божественной Благодати.

Велию милость Свою яви Господь, егда избра гору Печерскую свещницею быти, в нейже возгорится пламень веры православных, тьму кумирслужения разгоняя и землю Нижегородскую светом Христовым озаряя. Темже и ныне, Христе, молитвами преподобнаго просвети и ны Светом Истины Твоея, да тьмою заблуждения не погибнем.

Вознесшемся Ти, Христе Боже, на горе Елеонстей, образ миру показа во святости плотскаго обновления. Тако и се, во обители Печерстей храм Вознесения Господня устроивый, поручи преподобному Дионисию души словесных овец, от нихже и ты, блаженне отче, един бы окормление и духовное преображение.

Измлада Христа возлюбив, отче Иоасафе, во обитель Печерскую вселился еси, труды к трудам прилагая, смиренномудрия путем пред Богом хождаше; чистоту и целомудрие стяжевая, житию бесплотных подражаше; единою прилежа о душе бессмертней, егда в схиму облеклся еси. Темже благоугоди Господеви, сопричастник содеяся Лица Преподобных благосветлаго.

Егда призва тя Господь от трудов твоих, неключимым рабом не предста пред Ня, отче богомудре, но яко усердный трудник винограда Христова, от всех воздержавыйся в подвижении, еже телеси умерщвление и порабощение. Темже приял еси венец неистленен, иже в живот вечный.

Наказуяй чад Своих и милуяй, показа Ся людям нижегородским Господь, егда Промыслом Его гора Печерская потрясется и земля расседется; яви мощи твоя нетленны, отче Иоасафе, сонаследника ты Святых Преподобных Божиих, веры православных подвижников показуя.

Егда же мощи твоя, преподобне отче Иоасафе, положени быша в раце Храма Преображения Господня, людие православнии к ним притецаху и с любовию лобызаху я, бе бо струи благодатнии источаху. От нихже милостию Божиею больнии исцелеваша, слепии прозираша, ускорбленнии печалей свободашася. Темже лучи святых славы твоя земля Нижегородскую осияваша.

Слава, глас 6:

Крепко подвизался непрестанно в заповедей Христовых делании, явися, отче Иоасафе, Господеви работающе. Пению и чтению прилежа всеусердно, обогатился еси о Христе во всяком слове и разуме. Темже наставник монашествующих явился еси, все житие свое поживя пред Богом непорочне, светлейшие паче солнца добродетели стяжал еси. Сего ради сонаследник угодников Божиих содеялся еси, ныне молишися Пресвятей Троице о почитающих память твою.

И ныне, Богородичен воскресный: Кто Тебе не ублажит:

Вход. Прокимен дне. Преподобному паремии.

Премудрости Соломоновы чтение (глава 3):

Праведных души в руке Божией, и не прикоснется их мука. Непщевани быша в очесех безумных умрети, и вменися озлобление исход их. И еже от нас шествие сокрушение, они же суть в мире. Ибо пред лицом человеческим аще и муку примут, упование их безсмертия исполнено. И в мале наказани бывше, великими благодетельствовани будут, яко Бог искуси я, и обрете их достойны Себе. Яко злато в горниле искуси их, и яко всеплодие жертвенное прият я. И во время посещения их возсияют, и яко искры по стеблию потекут. Судят языком, и обладают людьми, и воцарится Господь в них во веки. Надеющиеся Нань разумеют истину, и вернии в любви пребудут Ему: яко благодать и милость в преподобных Его, и посещение во избранных Его.

Премудрости Соломоновы чтение (главы 5 и 6):

Праведницы во веки живут, и в Господе мзда их, и попечение их у Вышняго. Сего ради примут царствие благолепия и венец доброты от руки Господни: зане десницею покрывает я и мышцею защитит их. Приимет всеоружие рвение свое, и вооружит тварь в месть врагом.

Облечется в броня правды, и возложит шлем, суд нелицемерен. Приимет щит непобедимый преподобие. Поострит же напрасный гнев во оружие: споборет же с ним мир на безумныя. Пойдут праволучныя стрелы молниины, и яко от благокругла лука облаков, на намерение полетят. И от каменометныя ярости исполнь падут грады. Вознегодует на них вода морская, реки же потопят я нагло. Сопротив станет им дух силы и яко вихор развеет их, и опустошит всю землю беззаконие, и злодейство превратит престолы сильных. Слышите убо, царие, и разумеите, навывкните судии концев земли. Внушите держащий множества и гордящийся о народах языков, яко дана есть от Господа держава вам и сила от Вышняго.

Премудрости Соломоновы чтение (главы 4 и 5):

Праведник аще постигнет скончаться, в покои будет. Осудит же праведник умираяй живущия нечестивыя: узрят бо кончину праведнаго и не разумеют, что совещаща о нем. Яко повержет Господь нечестивыя безгласны ниц и поколеблет их от оснований, и до последняго исчезнут в болезни, и память их погибнет. Приидут бо в помышление согрешений своих ужасни, и обличит их сопротив беззакония их. Тогда станет в дерзновении мнозе праведник пред лицом оскорбивших его и отмечающих труды его. Видевше же его, смятутся страхом многим и ужаснутся о преславном спасении его. Рекут бо в себе кающиеся, и в тесноте духа воздохнут, и рекут: сей бе, егоже имехом некогда в посмех, и в притчу поношения, безумнии, житие его вменихом неистово, и кончину его безчестну. Како вменися в сынех Божиих, и во святых жребий Его есть. Убо заблудихом от пути истиннаго, и правды свет не облиста нам, и солнце не возсия нам. Беззаконных исполнихомся стезь и погибели, и ходихом стези непроходны, пути же Господня не разумехом.

На стиховне стихиры, глас 1.

Подобен: Небесных чинов:

Ныне память твою светло празднуем, отче богомудре, припадающе нетленным твоим мощем, да сими, уповающе, восприемлем душ наших исцеление, ума и разума просветление, веры Христовой укрепление. Ты же, преподобне отче Иоасафе, не престай молитися ко Господу о спасении душ наших.

Стих: Честна пред Господом смерть преподобных Его.

Подвизался еси крепко в Христовых заповедей делании, явися, преподобне отче, тщанием не ленив, духом же горяй, Господеви работающе. Темже скорби терпяще, упованием радовашеся, во умной молитве пребывая, яви себе яко воин Христов верный. Сего ради ныне в

селениях небесных с Лики Преподобных святых пребывая, в молитвах твоих поминай и нас, грешных.

Стих: Блажен муж, бояйся Господа, в заповедех Его восхощет зело.

Ревность имуще по Богу, а не по разуму, правды своя не ищуще поставити, но правде Божией повинулся еси. Темже выну близ ти быша глаголы Писания, во устех же твоих и в сердце. Сего ради содеяся, яко верующему в правду и исповедающему во спасение. Сие и ны, отче преподобне, буди в вере наставник и теплый молитвенник о душах наших.

Слава, глас 8:

Беспременно ходил еси, преподобне отче Иоасафе, путем заповедей спасительных Христовых, непрестанно хвалил еси сердцем, усты и делесы Всесвятое Имя Бога нашего; наставляя братию уклоняться пути погибельнаго, поставлял еси Закон Божий, яко светильник ногама и свет стезям их. Сие и ныне прошений наших не презри и молися Христу, спастися душам нашим.

И ныне, Богородичен воскресный:

Безвестная Дево, Яже Бога неизреченно зачещи плотию, Мати Бога Вышняго, Твоих рабов мольбы приими, Всенепорочная, всем подающи очищение прегрешений; ныне наша моления приемлющи, моли спастися всем нам.

Тропарь, глас 4:

Благочестия подвижнице, / образе смирения, / в вере Христовой крепко подвизался еси, / имени Христова призыванием непрестанно освящал еси житие свое. / Темже святых мощей твоих нетлением земля Нижегородская / во образ Божия благоволения освятилася есть. / Сего ради радуемся славе твоей небесней; / ты же, отче преподобне Иоасафе, / дерзновенно молися Пресвятей Троице / даровати нам велию милость.

Слава, и ныне, Богородичен

НА УТРЕНИ

По 1-м стихословии седален, глас 4.

Веры поборниче неколебимый, подвижнице благочестия, вся жития сего тленная презрел еси, единому Христу прилепился еси, темже во уповании на Бога николиже посрамился еси, и по успении твоём,

всеблаженне отче Иоасафе, велия сотвори чудеса исцеления. Сего ради ныне прославляем в песнях и похвалах святую память твою. (Дважды)

Слава, и ныне, Богородичен:

Разрушила еси, Всечестная, Божественным рождением Твоим праматернее сетование, явилася еси, яко светильник, огнем Божественным возжженный, миро благовонное Матерней любви всему миру изливая. Темже блажим Тя, Дево Препоблагословенная, всех земнородных славо и похвало.

По 2-м стихословии седален, глас 5.

Подобен: Собезначальное:

Иноческаго жития подвижника, воли Божией исполнителя песньми почтим, яко не расслаби души своея лению, но твердо стоял еси противу ухищрений всезлобнаго врага, побеждая все козни его в жестоцей невидимой брани и ныне молящаяся Господеви помиловаться душам нашим. (Дважды)

Слава, и ныне, Богородичен:

Тебя, Пречистую и Пренепорочную Деву, яви Господь Матерь Света, Слова воплощенна, да всем уповающим на Тя будеши вождественная Помощница, Иже силу Божественной Благодати подаваеши всем, во еже незаблудно теши Заповедей Христовых путем ко спасению душ наших.

По Хвалите Имя Господне: величание:

Ублажаем тя, преподобне отче Иоасафе, и чтем святую память твою, наставниче монахов и собеседниче ангелов.

Псалом избранный: Терпя потерпех Господа:

По полиелеи седален, глас 1.

Подобен: Гроб Твой, Спасе:

Постом и молитвою, преподобне отче, непрестай очищал еси вся чувства, потемненные страстьми, во еже не блуждати во тьме греховней; препроводил еси в покаянии слезном вся дни жития твоего, да приобретаеши свет благодатнаго утешения; темже приложился еси Славе Небесной нетленной. Сего ради Церковь Христова празднует днесь досточтимую память твою, сосуде Благодати, Богом избранный. (Дважды)

Слава, и ныне, Богородичен:

Преблагословенная Матерь Господа нашего Иисуса Христа, державною силою Твоею сохрани ны от суемудрия тлетворных учений и лукавых совращений, увлекающих во тьму душегубительную; да Твоим всесильным Покровом осененные во благочестии обрящем утверждение.

Степенна, 1-й антифон 4-го гласа.

Прокимен: Честна пред Господом смерть преподобных Его.

Стих: Что воздам Господеву о всех, яже воздаде ми;

Всякое дыхание: Евангелие от Матфея, зачало 43:

Рече Господь Своим учеником: вся Мне предана суть Отцем Моим, и никтоже знает Сына, токмо Отец, ни Отца кто знает, токмо Сын, и емуже аще волит Сын открыти. Приидите ко Мне вси труждающиеся и обремененнии, и Аз упокою вы. Возмите иго Мое на себе и научитесь от Мене, яко кроток есмь и смирен сердцем, и обрящете покой душам вашим. Иго бо Мое благо, и бремя Мое легко есть.

По 50-м псалме стихира, глас 6:

По апостольскому словеси, сеянное тобою в немощи восстало в силе, темже тело твое душевное восстало телесем духовным, и ты облекся еси, преподобне отче, во образ небеснаго нетления. Сего ради ныне со ангелы и всеми святыми предстояй Христу Богу, молися о любовьию чтущих тя, мир даровати душам нашим.

Канон, глас 8.

Песнь 1.

Ирмос: Воду прошел яко сушу и египетскаго зла избежав, израильтянин вопияше: Избавителю и Богу нашему поим.

Преподобне отче наш Иоасафе, моли Бога о нас.

Христову Истину возлюбил еси, блаженне, паче земнаго мудрования, отвергся еси пути беззакония, убелив паче снега душу свою, непрестанною молитвою со слезами стяжал еси чистоту сердечную, Храм Духа Святаго бывая.

Сокрушая дух свой в благоприятну Божови жертву, смирился еси под десницу Христову, восприим заповеди Его, яко иго легкое понес еси, вознося устнама хвалу Предвечному, темже яко чадо верное обрел еси Отчее благоволение.

На всяку ночь милосердием Божиим подвизался еси, еже избавитися всякия мирския злыя вещи и диавольскаго поспешения,

сподобился еси, преподобне, истинным Христовым Светом и просвещенным сердцем по вся дни творити волю Его, темже убо удостоился еси внити в Царство Небесное.

Всю настоящего жития преходя ночь бодренным сердцем и трезвенною мыслию, воздвизался еси еже в делание готову быти, стяжал еси велие множество от щедрот Царя Небеснаго, Того, дерзновение имуще, моли ущедрити и мое обнищавшее сердце.

Богородичен: Призри, Пречистая Дево, на мое ускорбленное сердце и советы противных разори, Ты бо еси наша Стена и Предстательство.

Песнь 3.

Ирмос: Ты еси утверждение притекающих к Тебе, Господи, Ты еси свет омраченных, и поет Тя дух мой.

Лукавнующим не поревновав, ниже завидя творящим беззаконие, все упование свое возложив на Господа, наслаждался еси, преподобне, Господеви, и даст ти сердца твоего хотение, еже праведну быти и наследити жизнь вечную.

Всякаго добра делатель бывая, скверн отложивши приражения, в кротости приял еси, блаженне, всажденное слово, творец слова быв усердный, а не точию слышатель забытлив. Тем же убо блажен сый в делании своем и верен.

Нищету Христову возлюбил еси, красная мира оставил еси всеконечно, да стяжаваеши ризу нетленну веры нелицемерная. Темже наследник Царствия Христова явился еси, еже обетова Господь всем любящим Его преизлиха.

Богородичен: Тобою, Пречестная, явися Слово воплощенно, Бог и Господь наш, Того умоли, Владычице, спасти души наша.

Седален, глас 4.

Подобен: Скоро предвари:

Благовестие Христово паче инаго обетования возлюбивый, на алтарь служения Божия жизнь свою положивый, отче наш Иоасафе, яко сердце любовию к людем распинати, сего ради присно воспеваем тя.

Слава, и ныне, Богородичен:

Тя и мамы, Владычице, едину Матерь Заступницу, к Тебе убо притекаем, слезя и моля Тя, ходатайствы Твоими помиловати и спасти ны. Темже непрестанно приветственно вопием Ти: Радуйся, Благодатная, Господь с Тобою.

Песнь 4.

Ирмос: Услышах, Господи, смотрения Твоего таинство, разумех дела Твоя, и прославих Твое Божество.

Веры чистей и неблазней еже к Богу вожделев, уздою крепкою увяза язык свой, да не ктому яко велеглаголанию быти, и не ульстити сердца своего суетьством веры, но нескверно блюститися от мира прелестнаго.

Апостольскому словеси поревновав, еже вера, аще дел не имать, мертва есть о себе, потщился еси искреннему своему поработати: наставник бывая монахом, братии же слуга усердный, людем приходящим и просящим попечитель и окормитель. Темже содеяся мужем силы и разума, в немже вера поспешествова делесем, и от дел усовершися вера.

Ум просветив от Господа, отверзал еси устне твоя по вся дни и нощи, непрестай пети и славити Пресвятую Троицу. Темже и мы вопием ти: настави ны, грешнии, на путь истины, преподобне отче, да и мы унаследим от щедрот Отца Светов.

Богородичен: Явилася еси миру, Пренепорочная Дево, яко древо светлоплодовитое, от негоже питаются вернии, усердно притекающие под покров благия сени листвия его.

Песнь 5.

Ирмос: Утреннююще вопием Ти, Господи, спаси ны: Ты бо еси Бог наш, разве Тебе иного не вемы.

От юности Христовым Заповедем поревновав, николиже запнул стопы своя завистию, рвением; нестроения и всякия злыя вещи отбежа, Богови повинулся еси, диаволу же мужески противлялся еси. Темже бо премудрость, яже свыше, стяжал еси, блаженне, еже по образу: сеяй плод правды мир храняй.

Ведуще добрая и творя я, приближися Богови, и Бог приближися тебе, отче богомудре, плач и печаль еже по Бозе обратя в веселие, а сетование в радость. Темже мзды делавшего ниву свою не удержав от тебе Человеколюбец, даровав честный плод от земли взоранной.

Несть источник, от единого устия источаяй сладкое и горькое, творяй слану воду и сладку, тако и се: от доброго жития дела своя показа, отче блаженне, в кротости и премудрости, стяжав веры дар совершен, сходяй от Отца Светов.

Богородичен: Матерь Божия Пречистая, Ты еси любви и свет всем с верою притекающим к Тебе, моли Христа Бога, да исцелит язвы озлобленных душ неисцельныя и просветит помраченный ум наш.

Песнь 6.

Ирмос: Молитву пролию ко Господу и Тому возведу печали моя, яко зол душа моя исполнися, и живот мой аду приближися, и молюся яко Иона: от тли, Боже, возведи мя.

Не пременил еси истину Божию во лжу, ниже послужил твари паче Творца, Иже есть благословен во веки, но разумев Бога, яко Бога прослави и возблагодари Его. Темже стяжал еси силу Божию во спасение верным.

Подвизался еси, преподобне отче, о преданной вере единою, не ходя в след плоти своея, и в лесь Валаамовы мзды николиже устремляшеся, но сам себе в любви Божией соблюл еси, ожидающе милости Христа Бога нашего еже в жизнь вечную.

Исповедающе Иисуса Христа, усердный явися делатель нивы Господней, первой заповеди Его прилежа, еже любити ближняго, яко сам себе. Темже молимтися: беспрестани память о нас твори, преподобне, да молитвами твоими подаст нам щедрот Отец дарование духовное ко утверждению.

Богородичен: Владычице Богородице, милостивая Заступнице о нас пред Богом, с матернюю любовью руководиши людии на путь спасения, темже непрестанно Тя величаем.

Кондак, глас 2.

Подобен: Вышних ища:

Духом Божиим водясь, / деяния плотская умертви, / снаследил еси Христу, с Ним же состражда; / сего ради свободился еси от работы истления, / Божиим содеяся чадом. / Темже молимтися, / да ходатайствы твоими свободи и нас от работы вражия.

Икос:

Явися, преподобне отче Иоасафе, сущим по предуведению званным, еже любящим Бога, сего ради вся ти поспешествоваша во благое, яко быти первородну ти во братиях многих. Темже пастырь овец Христовых бывая, овех страхом спасал еси, точию от огня восхищающе злых дел изымая, овех обличал еси с боязнию, овех же с рассуждением милуя, себе же верою святою назидая, Духом Святым молящеся. Сице и

ныне поминай нас, заблуждших умом, да твоими ходатайствы прямы сотворит Господь пути наша, да наследим жизнь вечную.

Песнь 7.

Ирмос: От Иудеи дошедше отроцы, в Вавилоне иногда верою Троическою пламень пещный попраша, поюще: отцев Боже, благословен еси.

Вся препобедив, блаженне, за возлюбившаго ны Христа Бога - скорби и тесноту, глад и наготу, беды и напасти - да ничтоже разлучит тя от любве Божия, темже непрестай воспевая: отцев наших Боже, благословен еси.

Духом Божиим водясь, деяния плотская умертви, снаследил еси Христу, с Нимже состражда; сего ради свободися от работы истления, в веселии поя: отцев наших Боже, благословен еси.

Сущия по плоти, по плоти же мудрствуют; ты же, блаженне, по духу живуще, разуме, яко вражда на Бога плотское мудрование, на духовное достизал еси по вся дни, радостно вопия: отцев наших Боже, благословен еси.

Богородичен: Материю Истины явилася еси, Пресвятая Дево, да Твоими молитвами на Небо взыдем, яко живую лестницею, поя и воспевая: отцев Боже, благословен еси.

Песнь 8.

Ирмос: Богоглаголивый отроцы в пещи, со огнем пламень попирающе, пояху: благословите дела Господня Господа.

Именем Иоасаф наречен быв, - сиречь Господь Судия есть - уразуме, преподобне отче, яко Суд Божий поистине есть. Темже уповая на богатство благодати Его и кротости, такожде долготерпение, устремил сердце свое на покаяние.

Долготерпением дела благаго повинулся еси истине, гнева и ярости отбежа, скорбь и тесноту телесную прия Бога ради, темже благодать Духа Святаго стяжа, со ангелы небесными ныне сликовствуеши.

Терпя потерпел еси Господа и не изнемог еси верою; тоуже оправдишася, мир имея к Богу, им же обрел еси благодать больныя исцеляти, заблудшия направляти, бесныя же свободжати.

Богородичен: Ты еси, Пресвятая Дево, источник благодатных исцелений всем требующим, егоже животворною водою радость спасения восприедем.

Песнь 9.

Ирмос: Устрашися всяк слух неизреченна Божия снисхождения, яко Вышний волею сниде даже и до плоти, от Девическаго чрева быв человек: темже Пречистую Богородицу вернии величаем.

Восприяв от Господа десять талант, принес еси плод Господину сторичный, не дав греху собою обладати; от негоже свободждшися, Богови поработися и имаши плод твой во святыню. Темже похваляем тя присно, отче преподобне Иоасафе.

Учением Христовым препитал еси ум свой, преподобне отче, разширил еси сердце свое на любы, еже к ближнему, простирая руце своя яже добрая творити. Сего ради мзду совершенную восприял еси души недугующих исцеляти при животе и по успении твоём.

Плоть твою со страстьми распиная, непрестанно ся утруждал еси постом и бдением, молитвою же со слезами и пением. Да видя тя Господь воина мужественно разяща ополчения бесовския, дарова ти благодать поборати силу вражю. Темже молимтися, преподобне отче Иоасафе, снабди и ны твоею помощию на отгнание бесовския приражения.

Не в меру мерит Христос, видя крепкое подвижание терпеливаго, щедро даря христолюбца даровании Духа Святаго. Темже и ты, блаженне, яви миру в венце славы, нетленны твоя соделавши мощи, имиже уздрави и ны, греховными страстьми истлевшия.

Богородичен: Путеводительнице подвижников благочестия, светоносная Палато Святых Святейшаго Слова, буди нам всем жезл опоры и просвещение веры, сердцем и умом к Небесному устремляющимся.

Светилен

Подобен: Жены, услышите:

Явил ся еси миру яко образ евангельскаго самоотвержения, преподобне отче наш Иоасафе, светом добродетелей твоих в мире просияв, темже с любовию почитаем память твою, чая от тебе милостиваго заступления и молитвеннаго вспоможения.

Богородичен:

Пречистую Приснодеву и Матерь Бога Слова сердцем и усты непрестай восхваляем и славим, яко Обетованнаго Сокрушителя главы змия рождшую.

На хвалитех стихиры самогласны, глас 6:

Слугою Божиим бываше всеусердным, в скорбех и бедах, в терпении мнозем, в теснотах и многоразличных искушениях крепко труждался еси, преподобне отче Иоасафе; темже не вотще приял еси благодать Божию: бе бо во время приятно послуша тя Господь и в день спасения помог ти есть. Сего ради и ныне, почитая святую память твою, кроткий работниче Христов, слезяще вопием ти: молися Христу спастися душам нашим. *(Дважды)*

Приспевшу светлу празднеству святых памяти твоея, преподобне отче Иоасафе, похвальная воспоем ти, созывающе преподобных ликостояния и ангельския чины, вкупе же с постники и монахи, еже по образу жития бесплотных, к прославлению в Троице покланяема Христа Бога нашего; и лобызаем нетленные мощи твоя, подающие надежду воскресения, его же верным обеща Христос, Спаситель душ наших.

Бог удоволи тя, преподобне отче Иоасафе, служитель быти Нову Завету не письменне, но духу, сиречь Господеви, бе бо Господь Дух есть. Сокровище же сие имал еси в скудельном сосуде, да премножество силы будет Божия, а не от человека. Темже свободь ся створи греха, и благодать Духа Святаго не тща в тебе бысть, к лику избранных Божиих сопричтен еси. Сего ради ублажаем Христа, тя прославившаго.

Слава, глас 2:

Верую ходя пред Господа, в жилище небесное облещися возжела, богомудре отче, явися во Христе яко тварь нова, тем бо ветхая совлачи с себе, в новая же оболчеша. Тако благоугоден сотворися Господеви, не вотще же прияв благодать Божию. Да, светом Христовым осиянный, ум наш просвети, преподобне отче Иоасафе, правило ны являя веры и образ душеспасения.

И ныне, Богородичен:

К Тебе, Мати Божия, молитвенне простираю руце и сердцем устремляюсь упованием, да непостыдна будет надежда моя под кровом любви Твоея сохранитися, смерти духовныя и тления убежати и наследити живот вечный.

Молитва

преподобному отцу схимонаху Иоасафу Печерскому

О, великий подвижнике благочестия, преподобне отче наш Иоасафе, миру явивый образ послушания, кротости и смирения, веры нелицемерной и пути истинного, еже в заповедех Христовых ходити и ангельскому житию подражати! О усердный трудниче нивы Христовой, плод сторичный стяжавый, имже обогатися земля Нижегородская в просвещение Светом Христовой Истины и укрепление веры православной! Днесь, светло празднуя память твою, богомудре отче, и предстоя раце святой, в нейже покоятся нетленные мощи твои, восхваляем и славим тя, понеже многими труды стяжал еси от Господа велию милость душ и телес благодатного исцеления всех, с верою припадающих к святым твоим мощам. Сего ради и ныне, немощьми духовными и телесными обремененные, молим тя, преподобне отче, мы, грешные и недостойные: имея дерзновение ко Господу, вознеси о нас свои многомощные молитвы, да ими испросиши земле нашей в вере православной утверждение, людем христианским в духовном возрастании преспеяние, в превременнем сем житии благоденствие с Божиим поспешением и в жизни вечной грехов оставление и душ наших спасение. Буди нам, отче преподобне Иоасафе, добрый наставник и защититель, непрестай вознося теплыя молитвы твоя о всех, с верою и надеждою просящих твоей помощи и молитвенного ходатайства пред Господом, Ему же подобает всякая слава, честь и поклонение Отцу и Сыну и Святому Духу ныне и присно, и во веки веков. Аминь.